

796 Nos vero te, donante Deo in pace cum certo consilio revertentem, spectemus in
 post Mai. 25. his, ut aestimo, regionibus. Sed obsecro, ut mox, te redeunte, dilectionis tuae litteras
 dirigas nobis, ut curiositas^a nostra certitudinem rerum per tuum intellegat consilium.

Regnum itaque illud diu stabile fuit et forte. Sed fortior est^b qui vicit illud; in
 cuius manu sunt omnes regum et regnorum potestates; et quemcumque voluerit, 5
 exaltat, et cuiuscumque cor voluerit, visitat, inluminat et ad suum convertit servitium.
 Et si illius gratia respiciet super regnum Hunorum, quis est, qui se subtrahere audeat
 ministerio salutis illorum?

Pauci nobis restant dies huius vitae; et valde desiderandum est Deique miseri-
 Cf. Iob 10, 20. cordia toto corde deprecanda, ut illi in opere Dei finiantur^c. Quia plus uniuscuius- 10
 que nostrum^d vita de fine iudicatur, quam de initio. In peccatis nascimur, sed gratia
 renascimur; quae nos in bono opere currentes comitetur et usque ad finem firmum
 perseverare faciat.

Tu vero, pater sancte, amice fidelis, frater dilecte, fili^f carissime, cum prosperitate
 bona, divina te^g comitante gratia, perge in opus Dei, et cum gaudio revertere ad nos. 15
 1. Cor. 3, 2. Et esto praedicator pietatis, non decimarum exactor, quia novella anima^h apo-
 Hebr. 5, 12. stolicae pietatis lacte nutrienda est, donec crescat, convalescat et roboretur ad accepti-
 onem solidiⁱ cibi. Decimae, ut dicitur, Saxonum subverterunt fidem¹. Quid inponen-
 dum est iugum cervicibus idiotarum^k, quod neque nos neque fratres nostri sufferre
 potuerunt? Igitur in fide Christi salvari animas credentium confidimus. 20

Vade modo, dilectissime frater, in benedictione Dei et consolatione sancti Spiritus.
 Albinus tuus est tecum in corde; quem utinam cito habeas socium in opere Dei.
 Nos matriculares pro te orare non cessamus, quatinus divina te ubique praeveniat et
 subsequatur gratia, ut cum multiplici pii operis fructu revertaris ad nos.

Bonos et relegiosos tecum habes^l socios. In quorum ore et conversatione nomen 25
 domini nostri Iesu glorificetur. Nos semper suspensi erimus de reditu tuo; donec
 videamus, quem amamus; amplectemur^m manibus, quem corde desideramus.

Tertiam vero partem de laboribus tuis per singula loca seu episcopatus seu
 Cf. Ier. 50, 31. monasterii concessit tibi rex in aelimosinam tuam tradere, si diesⁿ tuus te pro- 30
 sequeretur in via. Et hoc indiculis confirmari praecepit^o 2.

Ecce deficiente cartula non caritate pennam deponimus^p, haec salutationis tantum-
 modo verba subiectantes^q: Vivas Deo, feliciter vadas et proficiens floreas in opere
 Dei; et te ubique euntem et redeuntem summi regis dextera^r protegat^s et defendat,
 venerande, dilectissime et dulcissime.

^a) curiositas B. ^b) est scripsit J. pro eis S 1, B. ^c) firmanur B. ^d) n̄r S 1, B. ^f) filii S 1. 35
^g) tecum B. ^h) anima om. B. ⁱ) soli S 1. ^k) ideotarum S 1. ^l) habeo S 1, B. ^m) amplecter S 1.
ⁿ) clerus scripsit J. perperam pro dies S 1, B. ^o) praecipit S 1. ^p) deponibus B. ^q) subiectentes S 1, B.
^r) dextera S 1. ^s) protegat et defendat om. S 1; conservet S 1*.

1) Cf. *Capitulatio de partibus Saxonie c. 17 (Capitul. reg. Francor. I, 69)*: Similiter secundum Dei
 mandatum praecipimus, ut omnes decimam partem substantiae et laboris suis ecclesiis et sacerdotibus 40
 donent, tam nobiles quam ingenui, similiter et liti iuxta quod Deus unicuique dederit christiano,
 partem Deo reddant, *infra epp. 110. 111. 113. 174.* 2) Haec sic intellego Carolum litteris praecepisse,
 si clerus Salisburgensis episcopum suum Arnonem in Avariam comitaretur, ut tertia pars sumptuum
 cogeretur ex omnibus locis ad episcopatum et ad monasterium Salisburgense pertinentibus. J. (*Alias huius*
loci ambigui interpretationes vide apud Rettberg, Kirchengesch. Deutschlands II, 559; Zeissberg: Sitzungsber. 45
der philos. histor. Classe der Wiener Academie XLIII, 328; Hauck, Kirchengesch. Deutschl. II, 425).